



Marie oingt les pieds de Iesus : Judas murmure de l'onguent qu'il dit perdu, dont Iesus le reprend, approuuant cet acte.

AINSI que les Sacrificateurs & Scribes conseroient de mettre à mort Iesus-Christ, il vint en Bethanie chez Simon le Lepreux, où fut fait vn banquet, & Lazare (ressuscité des morts) y estoit, & sa sœur Marthe seruant. Et où Marie vint, & apporta vne boëte d'onguent precieux, dont elle oignit les pieds de Iesus, & les essuya de ses cheueux, dequoy Judas Iscariot murmura fort, disant : A quoy sert ce degast ? cet onguent pouuoit estre vendu plus de trois cens deniers, & estre donné aux pauvres. Or dist-il cela, non pour le soin qu'il eust des pauvres ; mais pource qu'il estoit larron, & auoit la bourse pour distribuer l'argent pour la necessité d'entr'eux. Mais Iesus dist, Laisse-là, elle a fait vn bon acte enuers moy ; car vous aurez tousiours des pauvres avec vous, mais vous ne m'aurez point tousiours ; elle a anticipé d'oindre mon corps pour ma sepulture. Je vous dis qu'il sera tousiours memoire de ce fait où sera presché l'Euangile. Lors Judas s'en va aux principaux Sacrificateurs, afin qu'il leur liurast son Maistre, lesquels composerent à luy d'une somme d'argent, pour leur liurer en temps propre.